



Berist til: Fjölmíðlar, almannavarnir.is, stjórnsýsla og tengiliðir sóttvarnalæknis.

## STÖÐUSKÝRSLA

Dags: 08.04.2020

Kl.: 16:00

Staðsetning: Samhæfingarstöð almannavarna/Embætti landlæknis/Sóttvarnalæknir,

### Neyðarstig vegna COVID-19

#### Framvindan

Upplýsingamiðlun, gerð leiðbeininga og ráðlegginga til almennings, stofnana og fyrirtækja. Allar leiðbeiningar er að finna á heimasíðu [Embættis landlæknis](#), [Ríkislögreglustjóra almannavarnadeild](#) og upplýsingasíðunni [covid.is](#)


Heilsugæsla höfuðborgarsvæðisins er lokuð um páskana, frá og með skirdegi, til og með annars í páskum, 9. til 13. apríl. Ráðgjöf er hægt að fá í vaktsíma 1700 og í netspjalli á heilsuvera.is. Í neyðartilvikum skal hringja í 112. [Sjá tilkynningu.](#)

#### Spálíkan fyrir fjölda tilfella og álag á heilbrigðisþjónustu


Sóttvarnalæknir kallaði saman vísindamenn frá Háskóla Íslands, embætti landlæknis og Landspítala til að gera spálíkan um líklega þróun COVID-19 faraldursins á Íslandi, sem gæti nýst við ákvarðanatöku um samfélagsleg viðbrögð og skipulag heilbrigðisþjónustu. Nálgast má upplýsingar um spálíkanið, aðferðir og forsendur má nálgast á vefsíðunni <https://covid.hi.is/> Helstu niðurstöður spálíkansins með gögnum til og með 5. apríl eru eftirfarandi:

- Gert er ráð fyrir því að á meðan þessi bylgja faraldursins gengur yfir muni rúmlega 2100 manns á Íslandi vera greind með COVID-19, en talan gæti náð nær 2600 manns skv. svartsýnni spá.
- Gert er ráð fyrir að fjöldi greindra einstaklinga með virkan sjúkdóm nái hámarki í fyrstu viku apríl og verði sennilega um 1400 manns, en gæti viku seinna náð 1700 manns skv. svartsýnni spá.
- Gert er ráð fyrir að á meðan að þessi bylgja faraldursins gengur yfir muni 140 manns þarfnast innlagnar á sjúkrahúsi, en gæti náð hátt í 170 manns.
- Mesta álag á heilbrigðisþjónustu vegna sjúkrahúsinnlagna verður fyrir miðjan apríl en þá er gert ráð fyrir að um það bil 70 einstaklingar geti verið inniliggjandi á sama tíma, en svartsýnni spá er 90 einstaklingar.
- Gert er ráð fyrir því að á tíma faraldursins muni um 28 einstaklingar veikjast alvarlega, þ.e. þurfa innlögn á gjörgæslu, á tímabilinu en svartsýnni spá er 41 einstaklingar.
- Mesta álag á gjörgæsludeildir gæti orðið í annarri viku apríl, en þá er búist við því að 11 manns liggja þar inni á sama tíma, en samkvæmt svartsýnni spá gætu það verið 19 manns.
- Smávægileg hliðrun aldursdreifingar í átt að fleiri greindum smitum meðal einstaklinga yfir sextugt myndi auka álag á heilbrigðisþjónustu talsvert.
- Greiningarvinna heldur áfram og spáin verður uppfærð reglulega. Hafa ber í huga að vegna fámennis geta tölurnar um fjölda greindra tilfella breyst mikið frá degi til dags sem hefur áhrif á spána, en hún verður stöðugri eftir því sem á líður.

#### Greind smit Uppsöfnuð greind smit



#### Virk greind smit á hverjum degi



Fjöldi staðfesta smitaðra hér á landi er nú 1.616 og 977 eru í einangrun. Alls eru 1.265 innanlandssmit og ekki vitað um uppruna 18 smita. Samtals hafa um 30,947 sýni verið tekin, 1.955 síðasta sólarhring. Af þeim sem greinst hafa með COVID-19 á Íslandi eru sex látnir.

[Skv. tölum Landspítalans](#) eru 38 á Landspítala með COVID-19 smit, þar af eru 9 á gjörgæslu og 6 í öndunarvél. 979 eru í eftirliti á Göngudeild COVID-19, þar af 93 börn í eftirliti Barnaspítala Hringins. Þá hefur 658 einstaklingum batnað og 44 einstaklingar hafa verið útskrifaðir af spítalanum.

#### **Upplýsingafundur dagsins:**

**Þórólfur Guðnason sóttvarnalæknir** fór yfir tölfraði dagsins yfir nýsmit, innlagnir, sóttkví, einangrun og fjölda þeirra sem er batnað og greindi frá því að ekkert andlát hefði orðið síðastliðinn sólarhring. Hann sagði að segja mætti að toppi hafi verið náð í faraldrinum. Ef miðað sé við fjölda þeirra sem er að batna sem eru fleiri en nýgreindir sé útbreiðslutala komin undir einn. Þótt faraldurinn sé á niðurleið megi ekki mikið út af bregða, staðan geti breyst með nýjum hópsýkingum en gleðjast megi yfir þeirri stöðu sem við erum í núna. Samfélagslegt smit sé lítið og bestu spá líkans Háskóla Íslands fylgt nema hvað varðar gjörgæsluinnlagnir þar sem fylgt sé verstu spá. Gagnlegt hafi verið að fá þetta líkan.

Þórólfur sagði að greiningartæki á veirufraeðideild LSH væri komið í lag og getan þar meiri en var.

Hann fór yfir það sem er fram undan og sagði að fylgjast þyrfti með framþróun faraldursins og vera m.a. vakaandi fyrir staðbundnum sýkingum. Verið sé að vinna að því hvaða aðgerðir verði eftir 4. maí en það verði tilkynnt seinna.

**Alma D. Möller, landlæknir** hóf mál sitt á að senda kveðjur og hrós og þakkir til þeirra fjölmörgu sem verða við umönnunarstörf yfir páskahátíðina, sérstaklega þar sem fólk þarf að vinna í viðamiklum hlífðarklæðnaði. Þá sendi hún sérstakar kveðjur á gjörgæslur á LSH og Akureyri.

Alma sagði að vel hefði gengið í heilbrigðiskerfinu hingað til og allar einingar kerfisins væru mjög samstilltar. Hún benti á að þótt komið væri yfir hápunkt varðandi nýgreiningar smita en hápunktur í heilbrigðisþjónustu komi viku til tíu dögum síðar. Því verður álag viðloðandi áfram á spítölum og nauðsynlegt að halda út. Hún minnti heilbrigðisstarfsfólk og stjórnendur á að hlúa að sér sjálfum og hvert að öðru og sendi kveðjur til sjúklinga og aðstandenda.

Þá ræddi Alma um Blóðbankann og biðlaði til virkra blóðgjafa að svara kalli eftir páska og mæta í blóðgjöf og þakkaði þeim fyrir sitt framlag.

Hún ræddi að bakvarðarsveitir hefðu sannað gildi sitt, en um 1100 úr 13 starfsstéttum eru í sveitinni. Ef fólk vantar bakverði af lista velferðarþjónustu á að tala við félagsmálayfirvöld í sveitarfélaginu og þau hafa aðgang að listanum.

Þá fór Alma yfir C-19 smitakningarappið. Það hefur komið að notum við að rekja ferðir fólks sem greinst hefur með smit.

Á miðnætti voru 121 þúsund símar komnir með appið. Minnti Alma á að því fleiri sem hafa appið því gagnlegra er það.

Að lokum ræddi Alma um þá sem treysta á stuðning AA. Þar sé boðið upp á netfundi og það sé gert á fleiri stöðum, svo sem hjá kirkjunni. Þá er hægt að halda fundi ef fjöldatakmörkun er virt og fjarlægðartakmörk um 2 metra.

**Sigríður Gunnarsdóttir framkvæmdastjóri hjúkrunar á Landspítala** fór yfir breytta starfsemi spítalans að undanfögnu en spítalinn en breytingar hafa orðið hjá öllum, fyrir sjúklinga, aðstandendur og starfsfólk. Hún sagði það hafa verið gríðarlega áskorun að undirbúa spítalann fyrir faraldurinn. Hann væri núna að taka á móti nýjum sjúklingahópi og einnig 20-25 bráðainnlögnum á dag, sem ekki tengdust Covid-19. Hún ítrekaði að fólk ætti ekki að hika við að leita til spítalans ef það þyrfti en benti á að dregið hefði úr valkvæðri starfsemi sem hefði keðjuverkandi áhrif til lengri og skemmri tíma.

Sigríður sagði að mikil áhersla hefði verið lögð á að byggja upp getu á gjörgæslu spítalans og á nokkrum vikum hefði rúmafjöldi á gjörgæslu rúmlega tvöfaldast. Nýr búnaður hefði borist og mönnun í hjúkrun styrkt. Bæði hefðu fengist til starfa reyndir gjörgæsluhjúkrunarfræðingar sem farnir væru til annarra starfa en einnig hefði spítalinn virkjað sína hæfu svæfingarhjúkrunarfræðinga sem hafa fengið stuðning og þjálfun. Þá kæmi nýr og stór hópur hjúkrunarfræðinga að starfsemi göngudeildar fyrir Covid-sjúklinga. Þeir kæmu úr bakvarðarsveit og af göngudeildum spítalana. Þá hafi þurft að manna fjórar nýjar legudeildir til að taka við veikum Covid-sjúklingum. Álag þar sé um 30-50% meira en venjulega vegna veikinda sjúklinganna og vegna breytts verklags, notkun hlífðarbúnaðar og slíks. Hjúkrunarfræðingar eru lykilstarfsmenn í þessu ástandi, sagði Sigríður. Ástæða þess hversu hratt hefði gengið væri að við búum yfir mjög menntuðu og hæfu starfsfólki og stöðugt eigi sér stað þróun og umbótastarf á spítalanum sem hægt er að virkja við þessar aðstæður. Hún fór yfir að fjölbreyttur hópur hefði gefið kost á sér, t.d. væru dæmi um að hjúkrunarfræðingar hefðu stýtt fæðingarorlof til að koma til starfa. Fólk víða úr atvinnulífinu hefði gefið kost á sér og þakkaði Sigríður þeim og einnig vinnuveitendum þeirra sem hefðu stigið fram og hvatt og stutt sitt starfsfólk til að koma inn í þessa vinnu með Landspítala.

Að lokum sagði Sigríður að toppur faraldursins væri enn eftir á spítalanum og sagði að jafnframt þyrfti að huga að því hvernig takast ætti á við verkefnið þegar það yrði minna um sig en áfram yrðu ærin verkefni í heilbrigðisþjónustu. Hún lauk máli sínu á að tjá djúpt þakklæti til allra sem vinna linnulaust að því að ná utan um þetta erfiða verkefni.

## **Pórunn Sveinbjörnsdóttir, formaður Landsambands eldri borgara.**

Pórunn hóf mál sitt á að hrósa fyrir daglega upplýsingafundi og sagði eldra fólk fylgjast með alla daga. Eldra fólk fyndi nú mest fyrir einmanaleikanum sem væri að verða hættulegur og kallaði á aðgerðir. Hún ræddi símavinakerfi Reykjavíkurborgar þar sem hringt væri í 85 ára og eldri og þeir spurðir hvort þeir óskuðu eftir að eiga símavini. 100-200 manns hefðu reynst vilja það. Hún sagði að forsvarsfólk sveitarfélaga sæi að elsti hópurinn þurfi meiri heimaþjónustu og umönnun en var. Unnið væri að því að nýta svokallaða velferðartækni með styrk frá félagsmálaráðuneytinu, sem gengur út á að ræða við aldraða í gegnum spjaldtölvu. Hún sagði að sumir sem eru einmana séu hættir að þora út í búð af ótta við að fólk rekist utan í það. Nauðsynlegt sé að fólk bretti upp ermar og sinni sínum nánustu betur. Unnið hafi verið að því að kynna bæklinga til að læra á spjaldtölvur en það sé til mikilla bóta ef eldri borgarar komi af krafti inn í netheima.

### **Víðir Reynisson yfirlögregluþjónn**

Víðir lauk fundinum á því að þakka öllum því fólk ætlaði að ferðast innnanhúss um páskana og gott að fólk ætli ekki að taka óþarfa sénsa þegar heilbrigðiskerfið er í hámarks álagi. Hann minnti á að þó í dag séu jákvæðar fréttir sé enn þá töluvert langt í land. Hafa þurfi mikla þolinmæði og þrautsegu, huga að hreyfingu og súrefni og því komast út úr húsi og fyrst og fremst að vera góð við hvert annað.

## **Upplýsingamiðlun og verkefni**

### **Í Samhæfingarstöð almannavarna fer fram samhæfing aðgerða og upplýsingagjöf á landsvísu vegna COVID-19.**

**Rauði krossinn.** Vegna álags á Hjálparsíma Rauða krossins 1717 og netspjallið 1717.is [hefur félagsmálaráðuneytið](#) ákveðið að styðja við þjónustuna. Stuðningurinn mun efla Hjálparsímann og netspjallið í að sinna meðal annars fjölskyldum, börnum og ungmennum, fötluðu fólki öldruðum og fólki af erlendum uppruna á þeim fordæmalasu tímum, sem nú eru uppi. Alls voru samtöl síðustu viku hátt á níundahundrað og bar helst á kvíða, einmannaleika, þunglyndi, atvinnuleysi og einnig voru samtöl varðandi COVID-19.

**Rauði krossinn og Slysavarnarfélagið Landsbjörg**  
hvetja fólk sérstaklega til að vera heima um páskana

**Borgaraþjónusta utanríkisráðuneytisins** [hefur vakið athygli á](#) því við Íslendinga sem staddir eru í Bandaríkjunum að þeir sem hafa ekki lögmeða ástæðu til að framlengja dvöl sína í Bandaríkjunum umfram það sem ESTA ferðaheimild þeirra segir til um, fái ekki sjálfkrafa framlengingu á sinni ESTA áritun, og að þeir sem dvelji þar fram yfir gildistíma áritunarinnar megi búast við að sæta endurkomubanni til Bandaríkjanna.

**Heilbrigðisstarfsmenn í Samhæfingarstöðinni.** Verið er að undirbúa úrræði fyrir jaðarsetta einstaklinga í virkri vímuefnanotkun sem eru heimilislausir og þurfa að fara í sóttkví eða einangrun.

### **Skólamál**

Frá því að auglýsing um takmörkun á skólastarfi vegna farsóttar tók gildi 16. mars sl. hefur mennta- og menningarmálaráðuneyti í samvinnu við Samband íslenskra sveitarfélaga og Kennarasamband Íslands fylgst náið með skipulagi og framkvæmd skólastarfs. Reglulega er fundað með stórum hópi lykilaðila, þar sem skipst er á upplýsingum um stöðu mála og einstaka álitamálum er komið í farveg ef með þarf. Skólaskrifstofur og skólar hafa gert nákvæmar verkætlanir sem meðal annars taka til þrífnaðar á húsnæði, skiptingu nemenda og starfsfólks í hópa, aðkomu að skólabyggingum og samskipta við foreldra.

Flestir leikskólar á landinu hafa haldið starfsemi gangandi en þó með breyttu sniði. Töluverður fjöldi starfsfólks leik- og grunnskóla með undirliggjandi sjúkdóma hefur kosið að halda sig heima í kjölfar auglýsingar um takmarkað skólastarf. Sama á við um þá sem fundið hafa fyrir kvefi eða vanlíðan og hefur það leitt til fjölgunar starfsfólks sem kosið hefur að halda sig heima. Grunnskólar halda úti kennslu fyrir nemendur, skóladagarnir eru styttri og fjarnám algengt í unglingsáldum. Jafnframt hefur kennsla í skólaþróttum og list- og verkgreinum víða verið felld niður. Í tónlistarskólum hefur hópkennta verið lögð niður en einstaklingstímum er haldið úti. Mötuneyti grunnskóla eru flest lokuð en á því eru nokkrar undantekningar og einstaka skólar leysa það með aðkeyptum matarpökkum. Einstaka sveitarfélög hafa fellt niður skólaakstur og er börnum þá kennt í heimabyggð annað hvort með fjarkennslu eða að skólahúsnæði í heimabyggð eru nýtt. Nokkrum grunnskólum hefur verið lokað vegna sóttvarnaaðgerða en í þeim hefur starfið verið skipulagt þannig að umsjónarkennarar og aðrir kennarar eru í daglegum samskiptum við heimilin. Sérkennarar og þroskaþjálfar eru í samskiptum við nemendur sem þurfa viðbótarstuðning og sinna áfram kennslu þeirra og við fjarkennslu, bekkjarfundi og

skil nemenda á verkefnum eru nýtt ýmis úrræði.

Framhalds- og háskólarnemar stunda nú fjarnám en skólabyggingar þeirrar eru lokaðar. Fjarkennsla í bóklegu námi hefur gengið vel. Mikil áhersla er lögð á gott og stöðugt samband á milli kennara og nemenda. Öll verkleg kennsla hefur verið lögð af og leggja skólar áherslu á fagbóklegar greinar. Framhaldsskólar hafa góða yfirsýn yfir nemendur í brotthvarfshættu. Margvíslegar aðferðir eru notaðar til að styðja nemendur áfram í námi, s.s. persónulegur stuðningur, netspjall og rafræn ráðgjöf.

### **Viðbragðsteymi til að draga úr þjónusturofi við viðkvæma hópa**

**Staðan í þjónustu við viðkvæma hópa er á heildina litið frekar góð** og ekki eru miklar breytingar frá því í síðustu viku. Undantekningar eru þó vegna hópsýkinga sem upp hafa komið í ákveðnum byggðalögum. Bakvarðasveit velferðarþjónustu fór í loftið 17. mars og eru nú komnar yfir 1.300 skráningar, flestar á höfuðborgarsvæðinu. Mikilvægt er að hvetja fólk um land til að skrá sig á lista bakvarðasveitar. Hópurinn sem hefur skráð sig er fjölbreyttur og samræmist það vel þeim ólíku störfum sem fyrir hendi eru í velferðarþjónustu. Nú þegar hafa 10 sveitarfélög óskað eftir liðsauka, ýmist fyrir sig sjálf eða stofnanir sem staðsettar eru í sveitarfélaginu s.s. hjúkrunarheimili o.fl.

**Barnaverndartilkynningar:** Ákveðið var að skoða sérstaklega fjölda barnaverndartilkynninga á landsvísu þar sem áhyggjur þar af lútandi komu fram í síðustu stöðuskýrslu viðbragðsteymisins. Tölfræðin sem Barnaverndarstofa birtir miðast við fyrstu þrjú mánuði ársins en þess má geta að mars var skoðaður sérstaklega og var hann ekki frábrugðinn mánuðunum á undan.

**Heimilisofbeldi:** Alls bárust 60 tilkynningar um heimilisofbeldi í mars og fjölgaði tilkynningum á milli mánaða.

Tilkynningar um heimilisofbeldi voru innan útreiknaðra marka fyrir síðustu sex og 12 mánuði á undan. Það sem af er ári hafa borist 5% fleiri tilkynningar um heimilisofbeldi en að meðaltali á sama tímabili sl. þrjú ár á undan.

**Staðan hjá sveitarfélögum:** Staðan hjá nær öllum sveitarfélögum er ágæt. Þó er um þriðjungur bæjarbúa í Bolungarvík í sóttkví og einnig mikill fjöldi á Ísafirði, eftir hópsýkingar sem þar blossuðu upp nýverið sem hefur haft í för með sér miklar áskoranir við veitingu þjónustu við viðkvæma hópa. Aðgerðaráætlanir hafa staðist á flestum stöðum en það er einkum að þakka mikilli vinnu stjórnenda og starfsfólks sveitarfélaganna sem hafa sýnt mikla útsjónarsemi og elju við að breyta og endurskipuleggja þjónustu við viðkvæma hópa andspænis þeirri áskorun sem COVID-19 faraldurinn er. Enn eru þó víða áhyggjur af mönnun ef upp koma smit.

**Málefni aldraðra:** Nær öll sveitarfélög hafa tekið upp úthringiþjónustu/skjáinnlit í einhverju formi til að ná til eldri borgara og einstæðinga í viðkvæmri stöðu með ráðgjöf, sálgæslu og eftirfylgni og mörg þeirra hafa útvíkkað þjónustu er varðar heimsendingar á tilbúnum mat og öðrum nauðsynjum.

**Heimilislausir:** Félagsmálaráðuneytið hefur samið við Reykjavíkurborg um að starfrækja tímabundið neyðarhúsnæði fyrir tiltekna hópa sem ekki hafa í nein hús að venda vegna COVID-19 faraldursins. Enn fremur var samið um auka stuðning og þjónustu við heimilislauða einstaklinga með flóknar og miklar stuðningsþarfir. Markmiðið með samningnum er annarsvegar að tryggja að einstaklingar sem lenda í húsnæðisvanda vegna COVID-19 geti leitað eftir ráðgjöf og húsnæðisúrræði til skamms tíma þar til aðrar lausnir finnast hjá félagsþjónustu þess sveitarfélags þar sem viðkomandi á lögheimili og hins vegar að tryggja að allir heimilislausir einstaklingar með fjölbættan vanda eigi kost á stuðningi og þjónustu, óháð lögheimili.

Bent er á að uppsöfnuð þörf verði fyrir aðstoð, s.s. áfallahjálp, ráðgjöf og stuðning við fjölbreyttan hóp, bæði barna og fullorðinna, þegar samkomubanni verður aflétt og hægt verður að veita þjónustu að nýju. Mikilvægt er að allir aðilar, þ.e. ríki, sveitarfélög og félagasamtök, sem koma að þjónustunni verði undirbúin fyrir það.

### **Vefurinn [www.covid.is](http://www.covid.is)**

Upplýsingar um tölfræði sjúkdómsins eru uppfærðar einu sinni á dag og birtar kl. 13:00 á vefsvæðinu covid.is

Á vefnum er hægt að nálgast upplýsingar um aðgerðir hér á landi vegna sjúkdómsins sem veldur COVID-19. Vefurinn er í sífellndri þróun og uppfærður reglulega.

- Sérstakur hnappur um geðheilbrigði [Líðan okkar](#) var uppfærður með margvíslegum upplýsingum og aðstoð í öllum landshlutum.
- Upplýsingasíðan [þarftu ráðgjöf](#) er einnig með uppfærðar upplýsingar um aðstoð sem er í boði, þ.a.m. hjálparsímar, netspjall, AA, NA og Al-anon fundir á netinu.

## Framundan:

- Upplýsingafundur fyrir fjölmiðla eru áætlaðir alla daga kl. 14:03.
- Næsti stöðufundur vegna COVID-19 er áætlaður laugardaginn 11. apríl 2020 kl. 9:00.

## Samráð og frekari upplýsingar

- **Allir íbúar Íslands** sem hafa dvalið erlendis og snúa heim 19. mars eða síðar þurfa að fara í sóttkví í 14 daga. [Sjá upplýsingar á vef embættis landlæknis.](#)
- Lýðheilsusvið embættis landlæknis hefur tekið saman heilræði sem byggja á niðurstöðum rannsókna á því hvað er gagnlegt að gera til að hlúa að andlegri, líkamlegri og félagslegri vellíðan. [Heilræðin eru nú birt daglega á vef.](#)
- [Sektir fyrir brot gegn sóttvarnalögum vegna COVID-19.](#) Frétt á vef stjórnarráðsins 27.03.2020.
- Fréttatilkynning heilbrigðisráðherra: [Samkomubann framlengt til 4. maí til að hefta útbreiðslu Covid-19](#) sem átti að falla úr gildi 13. apríl næstkomandi.
- [Leiðbeiningar fyrir einstaklinga með áhættuþætti fyrir alvarlegri sýkingu \(uppfært 30.03.2020\)](#)
- [Sjá nýlegar leiðbeiningar til notenda og aðstoðarfólks í NPA.](#)
- [Leiðbeiningar til veitinga og gististaða vegna hámarksfjöldi í hópum og hverju rými](#) . Nú er sem kunnugt er búið er að herða kröfurnar vegna samkomubanns og hámarks fjöldi í hópum og hverju rými er 20 manns. Ferðamálastofa hefur í samvinnu við Embætti landlæknis og heilbrigðisráðuneytið unnið leiðbeiningar. Munum einnig 2ja metra regluna.
- [Vinnueftirlitið hefur heimildir til að loka vinnustöðum sem ekki virða hið nýja samkomubann](#) Vinnueftirlitið beinir því til vinnustaða að hlíta hertum reglum um samkomubann. Að öðrum kosti er litið svo á að þeir ógni öryggi og heilbrigði starfsmanna sinna. [Sjá uppl. í tengslum við COVID-19.](#)
- [Bakvarðasveit lögreglu.](#) Óskað er eftir fólki, sem lokið hefur prófi frá Lögregluskóla ríkisins eða diplómaprófi í lögreglufræðum ásamt starfsnámi á vegum lögreglunnar.
- [Bakvarðasveit heilbrigðisþjónustunnar.](#) Heilbrigðisyfirvöld óska liðsinni heilbrigðisstarfsfólks úr hópi heilbrigðisþjónustu sem starfa hjá opinberum heilbrigðisstofnunum.
- [Bakvarðasveit félagsmálaráðuneytis Félags- og barnamálaráðherra og Samband íslenskra sveitarfélaga, vinna í sameiningu að því að koma á fót bakvarðasveit í velferðarþjónustu.](#) Hópurinn er fjölbreyttur og samræmist það vel þeim ólíku störfum sem fyrir hendi eru í velferðarþjónustu. Þegar hafa sex sveitarfélög og ein stofnun óskað eftir starfsfólki af listanum og hefur listinn reynst vel þegar upp hafa komið mál tengd COVID-19. Í flestum tilvikum hefur verið um að ræða sólarhringsþjónustu á heimilum fatlaðs fólks sem ekki má falla niður en auk þess hefur verið óskað eftir hjúkrunarfræðingum í heimahjúkrun og starfsmönnum í barnavernd.
- [Bakvarðalista fyrir Dýralækna- til að sinna dýralækningum.](#) sem atvinnuvega- og nýsköpunarráðuneytið, ásamt Matvælastofnun og Dýralæknafélagi Íslands hafa sett upp. [Bændasamtökin](#) hafa komið á fót miðlægdri afleysingaþjónustu fyrir bændur.
- [Leiðbeinandi viðmið um íþrótt- og æskulýðsstarf í ljósi takmörkunar á skólastarfi og samkomum.](#) Leiðbeinandi viðmið um hvernig beri að túlka auglýsingar um takmörkun á samkomum vegna farsóttar og takmörkun á skólastarfi vegna farsóttar þegar kemur að íþrótt og æskulýðsstarfi barna, ungmenna og fullorðna.
- [Heilbrigðiseftirlit Reykjavíkur – upplýsingasíða vegna COVID 19.](#)
- Hægt er að nálgast upplýsingar um niðurstöður sýna frá Íslenskri erfðagreiningu/DeCode í Heilsuveru undir valmyndinni „Samskipti“. Innskráning með rafrænum skilríkjum.
- Vefsíðan <https://island.is/> er upplýsinga- og þjónustuveita opinberra aðila á Íslandi. Þar getur fólk og fyrirtæki fengið upplýsingar og notið margvíslegrar þjónustu hjá opinberum aðilum á einum stað í gegnum eina gátt. Vefurinn er einnig á ensku.
- [Rakning C-19](#) Út er komið smáforritið (appið) Rakning C-19 sem er mikilvægur hlekkur í því viðamikla starfi sem er í gangi vegna Covid-19. Appið hjálpar til við að greina ferðir einstaklinga og rekja saman við ferðir annarra þegar upp kemur smit eða grunur um smit. Appinu hefur nú verið hlaðið niður í 121 þúsund símtæki. Appið er aðgengilegt í [App Store](#) og [Google Play English](#) [PolskuStjórnvöld koma til móts við vinnumarkaðinn.](#)
- Alþingi hefur samþykkt frumvarp, félags- og barnamálaráðherra, um rétt til greiðslu atvinnuleysisbóta samhliða minnkuðu starfshlutfalli vegna tímabundins samdráttar í starfsemi vinnuveitenda. Lögin fela í sér að laun sem greidd eru [samhliða minnkuðu starfshlutfalli](#) koma ekki til skerðingar á atvinnuleysisbótum.



- [Aðgerðastjórn almannavarna á Vestfjörðum í samráði við sóttvarnalækni og almannavarnadeild ríkislögreglustjóra](#) hefur ákveðið að bregðast enn frekar við COVID- 19 á Suðureyri, Flateyri, Þingeyri og Súðavík. [Enn eru hertar aðgerðir á Ísafirði, Hnífsdal og Bolungarvík.](#)
- [Íslensk heilbrigðisyfirvöld](#) hafa samið við Íslendinga um að sækja pöntun af hlífðarbúnaði fyrir heilbrigðisstarfsmenn til Kína. Búnaðurinn var pantaður fyrir nokkru síðan, þegar ljóst var hvað í stefndi vegna COVID-19 heimsfaraldursins. Góð samvinna hefur verið um þetta verkefni milli heilbrigðisyfirvalda, almannavarna, Íslendinga og utanríkisráðuneytisins.
- [Virkt hefur gefið út á vef sínum góð ráð.](#) Efnið er fjölbreytt og er ætlað að miðla góðum ráðum og ábendingum en líka hugmyndum að tækifærum sem hægt er að grípa í og afþreyingu til að létta lund.

## Staða mála

### Ísland - staðan í dag




## COVID-19 á Íslandi - Tölfræði

- Upplýsingar á síðunni eru sóttar úr gagnagrunni á miðnætti.


Uppfært daglega kl. 13:00

### Heildartölur



Af þeim sem greinst hafa með COVID-19 á Íslandi eru sex látin.

### Fjöldi virkra smita og þeirra sem er batnað




# Hlutfall smitaðra sem greinast í sóttkví




53%

þeirra sem hafa greinst voru í sóttkví




## Fjöldi smita



Download data

Þegar gefnar eru út upplýsingar um hve smituðum hefur fjölgað mikið frá deginum áður er það ekki alltaf svo að sambærileg tala birtist í síðu dagsins. Ástæðan er sú að birting upplýsinga um smit taka mið af því hvenær sýnið var tekið en ekki hvenær það var greint.

## Fjöldi sýna




Download data

## Fjöldi smita eftir kyni



Download data

## Uppruni smits



Download data


## Smit / sóttkví eftir landshlutum



Landshluti	Smit	Sóttkví
Höfuðborgarsvæði	1.162	2.461
Suðurnes	72	184
Suðurland	166	352
Austurland	6	42
Norðurland eystra	46	176
Norðurland vestra	35	32
Vestfirðir	54	321
Vesturland	30	110
Óstaðsett	45	517
Útlönd	0	0

Download data

## Fjöldi virkra smita eftir aldri, fjöldi þeirra sem hefur náð sér og andlát



## Kórónaveira – útbreiðsla erlendis

Í dag hefur sýking af völdum COVID-19 verið staðfest hjá **um 1,447,466 einstaklingum** samkvæmt John Hopkins og **um 83,471 einstaklingur** er látinn. Þá hafa **308,215 einstaklegar náð** sér eftir veikindin. Skv. ECDC er faraldurinn meðalstór fyrir hrausta einstaklinga en mikil lýðheilsu-ógn fyrir aldraða og einstaklinga með undirliggjandi sjúkdóma. Sjá vef [Sóttvarnastofnunar Evrópu \(ECDC\)](#) varðandi þróun mála í hverju landi fyrir sig. Sjá áhættumat ECDC.